

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

- श्रीनगर पार्लिमानी सीट पर चुनां लेई सब्बै तैआरियां मुकम्मल करी लैती गेइयां न। 17 लक्ख 40 ज्हार मतदाता 24एं मेदवारें दे भविक्ख दा फैसला करगंन।
- राष्ट्रपति द्रौपदी मुर्मू होर अज्ज राष्ट्रपति भवन च दुए आलंकरण समारोह च पद्म पुरस्कार भेंट करगंन।
- विदेश मंत्री डॉ. एस.जयशंकर होरें आखेआ जे देश पाकिस्तान दे नजैज कब्जे आले कश्मीर गी वापस आनने लेई पूरी चाल्ली वचनबद्ध ऐ।
- आईपीएल क्रिकेट च जंदी रातीं सनराईजर्स हैदराबाद नै लखनऊ सुपर जायंटस गी 10एं विकटें कन्नै हराई दित्ता। अज्ज धर्मशाला च पंजाब किंग्स ते रॉयल चैलेंजर्स बेंगलोर बश्कार मैच खेड्डेआ जाग।

<><><><><><>

Srinagar Seat

लोकसभा चुनाएं दे चौथे गेड़ लेई सब्बै तैआरियां मुकम्मल करी लैती गेइयां न, जेहदे तैहत श्रीनगर पार्लिमानी सीट सनें 96 लोकसभा सीटें लेई मतदान होग। 13 मई गी होने आले इस मतदान च श्रीनगर पार्लिमानी हल्के दे 5एं जिलें थमां 17 लक्ख 40 ज्हार मतदाता अपने वोट दे हक्कै दा इस्तेमाल करगंन। जिंदे च 8 लक्ख 70 ज्हार महिला बी शामिल न ते मेदवारें दे भविक्ख दा फैसला करगंन। प्रमुख मेदवारें च नैशनल कांफ्रेंस पार्टी थमां आगा सईद रूहुला मैहदी ते पीडीपी थमां वहीद –उर–रहमान शामिल न।

<><><><><><>

RO-Srinagar

श्रीनगर पार्लिमानी हल्के दे रिटर्निंग अफसर होर हाल च गै लगी दी जनसभा गी संबोधत करने दरान इक वरिष्ठ सियासीदान आस्सेआ ईवीएम दी कारकरदगी बारे इलजामें गी सिरे थमां नकारी दित्ता ऐ।

जारी इक ब्यानै च रिटर्निंग अफसर होरें आखेआ जे सब्बनें चुनाएं च जिंदे च 2024 दे चुनां बी शामिल न, इस्तेमाल होने आले ईवीएम ते वीवीपीएटीएं गी नां शड़ा चुनां आयोग ते लोकें आस्सेआ सगुआं सुप्रीम कोर्ट आस्सेआ खरी चाल्ली जांच ते तस्दीक कीती गई ऐ। उनें सब्बनें लोकें अगगे अपील कीती जे ऐसे बेबुनियाद ते झूठे इलजामें पर भरोसा नेई करन।

<><><><><><>

ECI Special Polling

दिल्ली च रवा करदे कश्मीरी विस्थापत समुदाय दे लोकें गी लोकसभा चुनाएं च वोट पाने लेई सहूलत उपलब्ध कराने लेई भारतीय चुनां कमीशन नै राष्ट्रीय राजधानी दी बक्ख-बक्ख थाहरें पर खास मतदान केन्द्र बनाए न। आकाशवाणी जम्मू दे संवाददाता नै खबर दित्ती ऐ जे मतदान केन्द्र कश्मीर रेजीडेंस कमीशन, 5 पी.आर.रोड नमीं दिल्ली, कश्मीर किसान घर बी.आर.-2 शालीमार बाग दिल्ली, अरवाचीन इंटरनेशनल पब्लिक स्कूल पॉकेट-एफ, दिलशान गार्डन, दिल्ली ते पपरावत नजफगढ़ दिल्ली च बनाए गेदे न। चुनां कमीशन नै इनें मतदान केन्द्रें पर वोट पाने आले कश्मीरी विस्थापतें गी मुफ्त ट्रांसपोर्ट दी सहूलत उपलब्ध कराने दे निर्देश दित्ते दे न। मतदान केन्द्रें तोड़ी पुज्जने ते वापस कैप च जाने लेई ट्रांसपोर्ट सेवा उपलब्ध कराई जाग। ?

<><><><><><>

Padma Awards

राष्ट्रपति द्रौपदी मुर्मू होर अज्ज दिल्ली च दुए लोक अलंकरण समारोह च पद्म पुरस्कार भेंट करगंन। देश दे सर्वोच्च सम्मान पद्म पुरस्कार त्रै श्रेणिएं च दित्ते जंदे न-पद्म विभूषण, पद्म भूषण ते पद्मश्री। कला, समाज सेवा, विज्ञान, उद्योग, बपार, दुआइयां, साहित्य, शिक्षा, खेड्ड ते लोक सेवा जनेह् बक्ख-बक्ख क्षेत्रें च एह पुरस्कार दित्ते जंदे न। हर ब'रे इनें पुरस्कारें दी घोषणा गणतंत्र दिवस पर कीती जंदी ऐ। पिछले म्हीने राष्ट्रपति होरें 3 पद्म विभूषण, 8 पद्म भूषण ते 55 पद्मश्री पुरस्कार 22 अप्रैल गी भेंट कीते हे।

<><><><><><>

Social Welfare

उपराज्यपाल मनोज सिन्हा होरें निर्देश दित्ता ऐ जे समाज कल्याण मैहकमे दिएं बक्ख-बक्ख योजनाएं तैहत लाभार्थिं गी 100 फीसद आधार कन्नै जोड़ना जकीनी बनाया जा। समाज कल्याण मैहकमे दी इक समीक्षा बैठक दी अध्यक्षता करदे होई उपराज्यपाल होरें पोषण अभियान तैहत प्रगति ते जिमीं सतह उप्पर एह्दे असर बारे बी जायजा लैता।

उनें आखेआ जे प्रशासन दे ध्यान समाज दे आर्थिक, समाजिक ते शैखिक रूपे कन्ने हाशिये उप्पर रोहने आले वर्गे उप्पर होना लोडचदा। उनें आखेआ जे महिलाएं दे सशक्तिकरण लेई प्रशासन आस्सेआ चेचा ध्यान दित्ता जाना लोडचदा। इस दरान उनें इक माहौल बनाने लेई लोडचदी गैह बारे चर्चा कीती तां जे एह लोके अपने समर्थ गी पंछानन ते ओहदा पूरा7पूरा इस्तेमाल करन। उपराज्यपाल होरे इस मौके उप्पर आंगनवाडी केन्द्रे दी भूमका पर बी लोह पाई। उनें आखेआ जे एह सेहत, शिक्षा ते बच्चे दी सुरक्षा लेइ इक महत्वपूर्ण केन्द्र दे तौर पर कम्म करदे न। उनें मुततलका अफसरें गी हिदायत कीती जे सब्बने आंगनवाडी केन्द्रे च जरूरी सहूलतां उपलब्ध करोआना जकीनी बनाया जा।

<><><><><><><><>

Culture

उपराज्यपाल मनोज सिन्हा होरे कल संस्कृति विभाग दे कम्मकाज ते कन्ने सांस्कृतिक विरासत दी सांझा-मया लते हिफाजत लेई कीते गेदे हीले दा बी जायजा लैता। उपराज्यपाल होरे वास्तुकला ते बन्न-सबन्ने नमूने दी हिफाजत ते इनेंगी बढ़ावा देने दी जरूरते पर जोर पाया ते मजूदा नीतिएं सरबंधी ढांचे च सुधार दा मशवरा बी दित्ता। उनें मैहकमे आस्सेआ खडेरी गेदी लाईब्रेरिएं बारे लोके दी प्रतिक्रिया मुत्तलक जानकारी बी हासल कीती। बैठक दरान अजैबघरे गी मता लोकप्रिय बनाने ते मैहकमे कश मजूद अभिलेखें सरबंधी समग्री दे डिजीटलीकरण सरबंधी मामले पर बी चर्चा कीती गई।

<><><><><><><><>

CS-Entrepreneurship

मुख्य सचिव अटल डुल्लू होरे कल युवा उद्यमी विकास अभियान बारे लोआई गेदी ध्याडे भरै दी कार्यशाला दा उद्घाटन कीता। इस मौके पर बोलदे होई चुल्लू होरे आखेआ जे इस सरबंधे च तैआर कीता जाने आला दृष्टि-दस्तावेज, उद्यम-कारखानादारी दे राएं साढे नोजवाने गी रोजगार दे मौके उपलब्ध करोआने लेई महत्वपूर्ण पैहलकदमियां करने च बड़ी कारी दा साबत होग। उनें सब्बने सरबंधत पक्खें पर जोर पाया जे ओह किट्टे रलियै इस दस्तावेज दा पैहला संस्करण तैआर करन। मुख्य सचिव होरे रोजगार पैदा करने आली बक्ख-बक्ख योजनाएं दी कामयाब अमलावरी च औने आली रूकावटे दी पंछान करने लेई बी आखेआ। एहदे अलावा उनें प्रदेश च मजूद अनोखे मौके ते फायदे पर बचार करने दी गल्लै पर बी लोह पाई।

<><><><><><><><>

Jaishankar-POK

विदेश मंत्री डॉ. एस.जयशंकर होरें आखेआ ऐ जे देश दा हर राजनीतिक दल पाकिस्तान दे नजैज कब्जे आले कश्मीर गी भारत कन्नै जोड़ने आले गी भारत कन्नै जोड़ने आस्तै वचनबद्ध ऐ। नमीं दिल्ली च गार्गी कालेज दे छात्रें कन्नै गल्लबात करदे होई मंत्री होरें आखेआ जे जम्मू कश्मीर च दफा 370 हटने मगरा पाकिस्तान दे कब्जे आले कश्मीर दा मुद्दा लोकें दे सामने आया ऐ। उनें आखेआ जे लोकें मन्नी लैता हा जे दफा 370 कदें बी हटी नेई सकदी, मगर मोदी सरकार दे फ़ैसले बाद जमीनी स्तर पर हालात पूरी चाल्ली बदली चुके दे न। पाकिस्तान दे नजैज कब्जे आले कश्मीर गी लेइयै इक संसदीस प्रस्ताव रखेआ गेआ ऐ जेह्दे तैह्त्त देश दी हर सियासी पार्टी नजैज कब्जें आले कश्मीर गी भारत कन्नै रलाने आस्तै वचनबद्ध ऐ। उनें आखेआ जे हुन जमीनी हालात पूरी चाल्ली बदली गेदे न ते मुख्य इस गल्लै गी जकीनी बनाने लेई वचनबद्ध ऐ जे मकबूजा कश्मीर दा इलावा वापस भारत गी हासल होए।

<><><><><><>

Kulgam Encounter

कुलगाम जिले च होए दे टाकरे आली थाहरै दे नेड़े गै सुरक्षाबलें ते इक होर आतंकवादी बश्कार होई दी गोलीबारी च सुरक्षाबलें त्रीये आतंकवादी गी बी मारी मकाया ऐ। सुरक्षाबलें आस्सेआ इस्से इलाके च टीआरएफ गुट दे इक सिरै दे कमांडर सनें दऊं आतंकवादिणं गी सुरक्षाबलें आस्सेआ ढेर कीते जाने दे इक दिनै परैत एह नमां टाकरा होआ ऐ। कुलगाम दे रेड़वानी इलाके च टाकरे आली थाहरै दे नेड़े घरें दी तलाशी दरान उत्थें छप्पियै बैठे दे आतंकवादी ते सुरक्षाबलें बश्कार फही गोलीबारी शुरू होई। टाकरे दरान सुरक्षाबलें इस त्रिये आतंकवादी गी बी मारी मकाया।

<><><><><><>

NIA JEM

राष्ट्रीय जांच अजेंसी एनआईए नै कश्मीर च आतंकवाद दी घुसपैठ दे मामले च बंदशयाफ्ता आतंकी संगठन जैशे-मोहम्मद दे इक सिरै दे उग्रवादी दी 6एं अचल जायदादें गी कुर्क करी दित्ता ऐ। अजेंसी नै इक ब्यान च आखेआ ऐ जे आतंकी आसिफ अहमद मलिक दी पुलवामा दे तीरपोरा च संपत्ति गी एनआईए दी जम्मू दी खास अदालत दे आदेश पर कुर्क कीता गेआ। इस आतंकवादी गी जनवरी 2020 गी गिरफ्तार कीता गेआ हा, ओह्दे कोला पीआर ते गोला बरूद बी जब्त कीता गेआ हा। मजूदा समें च ओह्दे पर एनआईए दी विशेष अदालत जम्मू च मुकदमा चला करदा ऐ।

एह मामला आतंकवादिएं गी ट्रांसपोर्ट सहूलत मुहैया कराने, बन्ने पारा थमां घुसपैठ कराने ते थेआर ते असला बरुद बरामद होने कन्नै जुड़े दा ऐ। एनआईए नै गैर कनूनी गतिविधिएं दी रोकथाम सरबंधी कनून तैह्त जम्मू कश्मीर च अजें तोड़ी 109 संपत्तिएं गी अटैच करी दित्ते दा ऐ।

<><><><><><>

Boat Srinagar

दक्खनी कश्मीर दे पुलवामा जिले हेठ औने आले अवंतीपोरा दे हातीवाड़ा ब्लाके च जंदी संजा 9 रमिकें गी लेइयै जा'रदी किश्ती झेहलम दरेया च डुब्बी गई। हादसे मगरा मकामी लोकें दी मदाद कन्नै 7 लोकें गी बचाई लैता गेआ ऐ जिसलै के 2 जनें अजें बी लापता न। इक अधिकारी मूजब एसडीआरएफ दिएं आीमें, पुलस तदे मकामी लोकूं लापता होए दे दऊं गैर मकामी मजूरें दा पमा लाने लेई अभियान शुरू करी दित्ते दा ऐ।

<><><><><><>

NDMA

केन्द्री गृह मंत्रालय पास्सेआ भेजी गेदी राश्ट्री आपदा प्रबंधन प्राधिकरण एनडीएमए दी माहिरें दी इक टीम नै रामबन जिले दे परनोट इलाके च जिमीं धस्सने आली थाहरै दा वयापक सर्वेखण शुरू करी दित्ता ऐ। आकाशवाणी दे रामबन संवाददाता मूजब एह टीम जिमीं धस्सने दे पिच्छे दिएं वजहें ते इस इलाके च भविक्ख सरबंधी खतरें दी व्यापक जांच करे करदी ऐ। टीम आस्सेआ इस बारे च लोड़चदे एहतियातें आली सलाह बी जारी कीती जाग। उआं फिलहाल माहिरें हाल दी घड़ी प्रभावत इलाके च दाखल होने थमां सब्बनें गी ठीकी दित्ते दा ऐ।

<><><><><><>

IPL

आईपीएल क्रिकेट च जंदी रातीं हैदराबाद दे राजीव गांधी अंतर्राश्ट्रीय स्टेडियम च खेड़डे गेदे इक मैच च सनराईजर्स हैदराबाद नै लखनऊ सुपर जायंटस गी 10एं विकटें कन्नै हराई दित्ता। पैहले बल्लेबाजी करदे होई लखनऊ सुपर जायंटस नै तैह 20एं ओवरें च 4 विकटें दे नुकसान पर 165 रंज बनाए। एहदे परतै च सनराईजर्स हैदराबाद नै सिर्फ 9 ओवरें ते 4 गेंदें च गै बगैरा कुसै नुकसान दे 167 रंज बनाइयै मैच जित्ती लैता।

अभिषेक शर्मा ते ट्रेविस हैड दी सलामी जोड़ी नै नाबाद 75 ते 89 रंज बनाइयै लक्ष्य गी बड़ी असानी कन्ने हासल करी लैता। अज्ज धर्मशाला च पंजाब किंग्स ते रॉयल चैलेंजर्स बैंगलोर बश्कार मैच होग, मैच संजा साढ़े 7 बजे शुरू होग।

<><><><><><>